

Bulitinu Infurmativu

Tu treia stâmânâ parlamentarâ di estanu, ditu meslu Cirisharu, di la Cunsillu ali Ivropâ di Strasburg (22.06 – 26.06), unâ diligatsiuni di la Cunsillu Armânjloru adră unu uspetsu di lucru tu dzuua di Gioi, 25-li di Cirisharu 2009.

La aestâ andamusi di Strasburg, diligatsiunea Armânjloru – Grâmâticlu Gheneralu CA Niculaki Caracota, v-prizidentulu CA(Frântsie) Iancu Perifan, v-prizidentulu CA(Arbinishie) Arben Lena, prizidentulu ali Cumisiunea di Cenzori CA Niko Dzega(Arbinishie), di partea CA sh Thimi Granioti, prizidentu a Sutsatâljei „Muscupolea“ di Sârunâ / Gârtsie – avu muabets di simasie cu parlamentari ivrupeanji di la diversi dipartamenti di la Cunsillu ali Ivropâ.

S-purtarâ muabets di simasie la sicritariatlu di la dipartamentulu “Committee on Legal Affairs and Human Rights“, andicra di raportulu trâ minoritâtsli ivrupeani tsi lu-andreadzi prezidentulu di la “Sub-Committee on Rights of Minorities”, raportu tu cari va s-azburascâ sh-ti catandisea Armânjloru.

Alti muabets di simasie s-purtarâ la dipartamentulu “Charta limbiloru minuritari sh righiunali”, la Cumisiunea Culturala, cum sh-la Dirictsiunea ONG cari andreadzi un raportu trâ aprukearea Cunsillui Armânjloru ca organizatsiuni non-guvernamentalâ pi ninga Cunsillu ali Ivropâ, tu tesa di “ONG cu statutu partitsipativu”. Aestu raportu, cari va s-andreagâ dupu tsi va hibâ aprukeati cândâserli di la multi alti dipartamenti di la Cunsillu ali Ivropâ, lipseashti prota s-aibâ apofasea di la Cumitetlu di Minishtsrâ, apofasea finalâ va hibâ loatâ tu Adunarea Parlamentarâ a Cunsillui ali Ivropâ, tu atsea ditu soni sesiuni parlamentarâ anualâ, tu ishita di Yismâciunu sh-ahurhita di Sumedru, estanu.

Tu bitisita alishte di dzuuâ di uspets di lucru la Cunsillu ali Ivropâ, diligatsiunea di la Cunsillu Armânjloru avu unâ andamusi cu Prizidentulu a Adunariljei Parlamentari a Cunsillui ali Ivropâ, Prof. Lluís Maria de Puig. S-azburâ tu aestu “randez-vous” di andrupimântulu tsi prizidentulu Lluís Maria de Puig va-lu da sh-di-ava sh-nclo, andicra di ligâturli tsi Cunsillu Armânjloru lipseashti s-li adarâ Strasburg sh-Bruxelles. Tutu tu aestâ andamusi cu prizidentulu Lluís Maria de Puig, s-purtarâ muabets ligati di andridzerli trâ unu Congresu a Armânjloru, nica estanu, sh-ti itia câ estanu s-umplurâ 60 di anji di cându s-amintâ Cunsillu ali Ivropâ.

Cunsillu Armânjloru(Makedonarmânjloru)
Biroulu di Cumândâseari

tu 15-li di Alunaru 2009

(Bulitinu Infurmativu Nr.12)